


19468

ՄԱՏԵՆԱՇԱՐ «ՇԱՆԹ» - ԹԻՒ 5

ԵՐՈՒԱՆԴ ՕՏԵԱՆ

ՊԱՏԵՐԱՁՄ ԵՒ... ԽԱՂԱՂՈՒԹԻՒՆ

(ԸՆՏԱՆԵԿԱՆ ՆԱՄԱԿԱՆԻ)



« CHANTH » - ARTS & LETTRES
30 RUE DROUOT - PARIS (9^e)

1911

ՊԱՏԵՐԱԶՄ ԵՒ... ԽՍԴԱՂՈՒԹԻՒՆ

413

ՄԱՏԵՆԱՇԱՐ « ՇԱՆԹ » - ԹԻՒ 5

891.99

0-79

ԵՐՈՒԱՆԴ ՕՏԵԱՆ

ՊԱՏԵՐԱԶՄ Եհ... ԽԱՂԱՂՈՒԹԻՒՆ

(ԸՆՏԱՆԵԿԱՆ ՆԱՄԱԿԱՆԻ)



« CHANTH » - ARTS & LETTRES
30 RUE DROUOT - PARIS.

34-671-44-L

ՆԱԽԱԲԱՆԻ ՏԵՂ

Լէվ Թուլսթոյի աշխարհահռչակ վէպին հայերէն թարգմանութիւնը չէ որ պատիւ պիտի ունենամ ներկայացնելու մեր ընթերցողներուն, այլ երկու եղբայրներու միջեւ փոխանակուած նամակներու տրծակ մը։ Իսկ խորագիրը զոր փոխ կ'առնեմ ոռու մեծանուն իմաստունէն, պարզապէս իրեն վերադարձնելու համարէ, երբոր նամակներու հրատարակումը աւարտի։ Ուրեմն բանագողութիւն չկայ գործին մէջ, այլ բանափոխառութիւն։

Ո՞վ են այս երկու եղբայրները որոնց ընտանեկան գաղտնիքները այսպէս անխորհրդապահութեան չորս հովերուն կը ցըռւեմ։ Ամէն ընթերցող իրաւունք ունի այս հարցումը ուղղելու ինձի եւ ես պատասխանելէ չեմ կրնար խուսափիլ։ Պատմեմ ուրեմն իրողութիւնը իր բովանդակ եթերային մերկութեամբ։

Քրիստոնեաներու Զինուորագրութեան Օրէնքը գործադրութիւն սկսելուն պէս, երեք եղբայրներ, Մարուքէ, Յովինան եւ Սիմոն Խօշագիւն, ընտանեկան ժողով մը կազմեցին, իրենց գիրքը որոշելու համար հանդէպ նոր օրէնքին։ Անդրանիկը, Մարուքէ, ամուսնացած եւ հայր երկու զաւակներու, նախ խօսք առաւ եւ ըստւ։

— Ինչպէս յայտնի է, ես, իբրեւ մուին, ամուսնացած եւ երկու զաւակներու տէր եւ միանդամայն մօրս նեցուկ, զրկուած պիտի մնամ մեր սիրեցեալ հայրենիքին համար արիւնս թափելու փառքէն...

2003



17853-59

Եւ այս խօսքերը արտասանած ատեն երկու խոշոր արցունքներ, մին աջ միւսը ձախ աչքին անկիւններէն մեկնելով՝ յամբընթաց եւ համաշափ զնացքով մը սկսան սահիլ այտերէն վար, քիչ մը շատ խմած դինովներու պէս, որոնք զառիվայրէ մը կը գլորին:

— ... թափելու փառքէն, շարունակեց Մարուքէ, բայց դուք որ ընտանեկան շղթաներու մէջ ձեր էութիւնը չէք կապկամ, որ ձեր բազուկները, ոտքերը, գլուխը եւ ձեր մարմնոյն միւս քոլոր յարակից մասերը կրնաք տրամադրել հայրենիքի մեծութեան եւ բարզաւաճումին, անշուշտ բախտ պիտի ունենաք օգտուելու նոր օրէնքի տրամադրութենէն եւ պիտի վաղէք թշնամիին առջեւ, ջանալով որ զնդակները ուղղակի ձեր սրտին դան եւ ո՛չ թէ յետոյքին:

Լուռ ծափահարութիւն մը ողջունեց անդրանիկին այս մարտաշունչ խօսքերը: Յովնան, երեք եղբայրներու երկրորդը, խօսք առաւ իր կարգին. պարզեց հայրենասիրական պարտականութեանց մասին իր աշխարհահայեցքը, ըսաւ թէ ինք զինուոր ըլլալով՝ երկրին մէկ զինուոր մը միայն նուիրած պիտի ըլլար, ինչ որ անբաւական էր զինքը կիծող հայրենասիրութեան համար, ինք կ'ուղէք բազմապատկուիլ եւ փոխանակ մէկի՝ հինգ, վեց եւ եթէ կարելի էր, ութը տասը զինուորներ նուիրել հայրենիքին, զինուորի հանք մը ըլլալ անսպառուրկէ հայրենիքը կարենար ուզած ատեն, քաղել իրեն պէտք եղած բազուկները: Ու այս սուրբ նպատակին հասնելու համար, յետ երկար եւ քրտնաշան խորհրդածութեան, որոշած էր ամուսնանալ անմիջապէս եւ խորյուն սկսիլ զինուորաշինութեան դործին:

— Միտքդ հասկցայ, ըսաւ կըտսերը Սիմոն, հեղնոտ քմծիծաղով մը, պարզապէս կ'ուղես ամուսնանալ

որպէսպի զինուոր չերթաս եւ ընտանեկան խաղաղ անկորրութիւնը վայելես... լա՛ւ, ուղածիդ պէս ըրէ, հայրենիքը կրնայ վազ անցնիլ քեզի պէս երկչուներէ, ես, «յամենայն դէպս» անպայման զինուոր պիտի ըլլամ, նոյնիսկ եթէ քուէն ինծի չելլայ...

Պէտք է ըսել որ երեքն ալ անկեղծօրէն կը խօսէին, իրենց բնական տրամադրութիւնն հետեւելով, թէեւ կարելի է պնդել որ այդ տրամադրութիւնը քիչ մըն ալ շինուած էր իրենց երկարատեւ ընթերցումներուն շընորհիւ: Այսպէս, օրինակի համար, Մարուքէ հաւատացեալ ընթերցող մըն էր Բիւզանդիոնի, Յովնան Կոյր ընթերցող մը ժամանակի եւ Սիմոն խանդավառ ընթերցող մը Ազատամարտի: Այս ընթերցումներուն անմիջական արդիւնքը այն եղած էր որ առաջինը իր ձմեռուան փայտն ու ածուխը յուլիս ամիսէն կ'առնէր ու կը մթերէր տան մէջ, երկրորդը՝ մտացածին ու զգայացունց պատմութիւններով կը խարխրէր դէմը ելլողը. իսկ երրորդը մէջքի մետաքսէ դօտին իրեւ վզնոց կը դործածէր եւ ազգ բառը ազգ կը հնչէր եւ անպատճակին անպայման կ'ըսէր:

Եւ եղած այնպէս ինչպէս տնօրինուած էր ընտանեկան խորհրդակցական ժողովին մէջ: Յովնան ափ յափոյ ամուսնացաւ ընտանեկան խաղաղութիւնը եւ նորածիններու ճիչերն ու արտադրած հոտերը նախընտրելով՝ զինուորի պատերազմական կեանքին, թնդանօթի որոտաւմներուն, վասովի հոտերէն, մինչ Սիմոն, որուն քըւէն ելած էր արդէն, մախաղը կոնակը զարկած, զինուորական վերաբկուն ուսին վրայ, խրոխտ ու առնական, շողեկառք կը մանէր երթալու համար դէպի երկրորդ զօրաբանակը, ուր պիտի սկսէր իր չարքաշ հայրենասէրի փառաւոր կեանքը:

Մինչեւ այն ատեն միեւնոյն երդիքին տակ քով քովի ապրող այս երեք եղբայրներուն համար կեանքի այս յեղաշրջումը եւ բաժանումի դառնութիւնը նոր բուռն ազգեցութիւն մը ըրաւ ամէնուն վրայ հաւասարապէս։ Ու երբ երկու եղբայրները իրենց կրտսեր հոգեհատորը առաջնորդեցին Սիրքէճի կայարանը ուրկէ անիկա պիտի երթար հայրենիքին նուիրուելու, Մարուքէ իբրեւ երթաս բարովի ընծայ տուփ մը նամակաթուղթ եւ պահարան տուաւ զինուորին, մինչ Յովնան արտասուալից աչքերով անոր կը յանձնէր գրիչ մը եւ շիշ մը մելան եւ կ'ըսէր։

— Սիմոն, գոնէ երկու շաբաթը անդամ մը նամակը անպակաս ըրէ։

Եւ ահա այն ատեն կանոնաւոր թղթակցութիւն մը սկսու երկու եղբայրներու միջեւ, որոնք փոխն ի փոխ իրարու կը պատմէին, մին իր մարտական արկածախընդէ՛ր կեանքը, միւսը իր ընտանեկան անդորրիկ խաղաղութիւնը . . . Ահա՛ թէ ուրկէ ծագում առաւ այս ընտանեկան նամականիքին ընդհանուր տիտղոսը «Պատերազմ եւ . . . խաղաղութիւն»։

Մտերմական շրջանակի մը մէջ միայն կարդացուելու սահմանուած այս նամակները հարտարակելով կը կարծեմ օգտակար ծառայութիւն մը մատուցանել մեր այն բոլոր երիտասարդներուն՝ որոնք զինուորական ծառայութեան տարիքին մէջ գտնուելով՝ յաճախ փորձութիւնը կ'ունենան զօրանոցէն փախչելով ամուսնութեան առաջաստին տակ ապաստանելու, եւ միտքերնին չեն բերեր այն ծանօթ առածը թէ «մարդ երբ անձրեւէն կը փախչէ՝ յաճախ կարկուտի կը հանդիպի»։

Հրատարակելի նամակներուն ընազիրները պահուած են քովս թերահաւատ ընթերցողներու տարակոյար փարատելու համար, եթէ հարկ ըլլայ։

ՊԱՏԵՐԱՋՄ ԵՒ . . . ԽԱՂԱՂՈՒԹԻՒՆ

(ԸՆՏԱՆԵԿԱՆ ՆԱՄԱԿԱՆԻ)

Ա.

ՍԻՄՈՆ Ա.Ռ ՅՈՎՆԱՆ

1909 ՍԵՊՏԵՄԲԵՐ

Սիրելի եղբայրս,

Կեցցէ՛ներու խանդավառ տարափի մը տակ երբ մեր չողեկառքը ճամբայ ելաւ Սիրքէճի կայարանէն ու դուք աչքերէս անհետացաք, պահ մը յուղուած մնացի վակօնիս պատուհանին առջեւ։ Բայց այս երազուն դիրքըս երկար չտեւեց : Ընկերներէս մին կոնակիս մէջտեղը կոռուփի աղուոր հարուած մը իջեցուց կատակի համար եւ խկոյն ետիս դարձայ, քահքահներու ընդհանուր աղմուկի մը մէջ։

Տասը հոգի քով քովի սեղմուած էինք, այսուհանդերձ խոլ զուարթութիւն մը, թերեւս քիչ մը շինծու եւ բոնազրոսիկ, տիրած էր ամէնուս վրայ : Դուրսը երկաթուղիին ճամբուն երկայնքը կեցող բազմութիւնը,

— Կեցցե՛ն զինուորները, կեցցէ՛ հայրենիք, կեցցէ՛ ազատութիւն, կ'որոտար :

Որոնց մենք ալ հոմանիշ ու բարձրագուչ կեցցէներով կը պատասխանէինք :

Հետզհետէ անցանք Գում-Գարուի, Եէնի Գարուի,

Սամաթիայի, Եէտի Գուլէի եւ Մաքրի Գիւղի կայարաններէն, նոյն խանդավառ ցոյցերու եւ ոգեւորութեան մէջ:

Սիրտս ուրախութենէ կը խայտար եւ ինծի այնպէս կուզար որ նոյն միջոցին, եթէ հարկ ըլլար, ես առանձին պիտի կրնայի դիմադրել եւրասկական նիզակակցութեան մը, եթէ փորձէր մեր նուիրական հայրենիքին մէկ պատառին աչք տնկելու:

Ա՛հ, սիրելի Յովնան, գեղեցիկ ու վսեմ բան մըն է զինուորութիւնը: Զգա՞լ թէ քու հացանիդ ու բազուկիդ ապաւինած են միլիոնաւոր մարդիկ, զգա՞լ թէ դո՞ւն ես որ սահմանագլխին վրայ անքուն կը հսկես որպէսզի հանդարտ տրտով հողագործը իր հունձքը քաղէ, վաճառականը իր առուտուրը ընէ, պաշտօնեան իր թիկնաթոռին վրայ մրափէ, ուսումնատենչ երիտասարդութիւնը դպրոցական գրասեղաններու վրայ իր ապագան պատրաստէ, բանաստեղծը երգէ, յեղափոխականը գործէ, աղուոր աղջիկները սիրաբանեն եւ անմեղ մանկլտին ցատկուտէ փողոցները... այո՛, մտածե՞լ որ հայրենիքը քու բազուկիդ յենած է. միթէ կարելի՞ է ասկէ հոյակապ երազ մը ունենալ:

Մեր ուղեւորութիւնը, մինչեւ կտիրնէ, կրնամ ըսել, եթերային անուրջ մը եղաւ. անընդհատ երգ, ծիծաղ, կեր ու խում: Մեր վակօնին մէջ միակ Հայն էի ես, կային նաեւ երեք Թուրք, երկու Առնաւուտ, մէկ Յոյն, մէկ Հրեայ, մէկ Արաք եւ մէկ Լազ: Տեսնալու էր սակայն այն եղբայրական համերաշխութիւնը որ կը տիրէր այս բարելոնական խառնակութեան մէջ: Կրօնքներն ու ազգութիւնները իրար խառնուած, ընդապուցուած, շաղուած ու խմորուած եւ հայրենիքի վառարանին վրայ եփուած, տեսակ մը համեղ ու բուրումնաւէտ օս-

մանցիական կարկանդակ ձեւացուցած էին: Եղիպտական աղամաթիւդը կամ սովորական անունով պանանը կամ մօգ կերա՞ծ ես արդեօք, որմէ ամէն պտուղի համ կարելի է առնել քիչ մը բարի կամեցողութեամբ եւ շատ մըն ալ ինքնախարէութեամբ: Մեր կազմած օսմանցիական կարկանդակն ալ եթէ կարելի ըլլար ճաշակել, պիտի տար ամէն կրօնքներու և ցեղերու հոտն ու համը:

Հետեւեալ առտու կանուխ հասանք կտիրնէ եւ երբ մէր վակօններու անվերջանալի շարքը մտաւ դրոշապարդ կայարանը ու կանդ առաւ, զինուորական նուագախումբը սկսաւ հնչել եւ հազարաւոր կոկորդներէ «կեցցէ՛ օսմանեան բանակը» աղաղակը օդը պատոեց եւ վեր բարձրացաւ:

Ամէնքս ուրախ զուարթ վար ցատկեցինք վակօններէն, փառաշուք տօնի մը գացող հանդիսականներու պէս:

Բ.

ՅՈՎՆԱՆ ԱՌ ՄԻՄՈՆ

1909 Մեպսեմբեր

Միրելի Եղբայրս,

Ուրախութիւն, երջանկութիւն: Մե՛ղք որ դուն հոս չէիր. մինչեւ ետքը քեզ յիշեցինք ու կենացդ պարպեցինք:

Մեկնելէդ հազիւ շարաթ մը ետքը կատարեցինք հարսնիքը, որովհետեւ արդէն իսկ ետեւէս ինկած էին զինուոր առնելու համար: Ինչ որ է, փա՛ռք Աստուծոյ, այժմ աղատեցայ: Հիմա մնուին եմ:

Միրելի Եղբայրս, չես գիտեր որչա՞փ երջանիկ եմ այս ամուսնութիւնը կնքելու եւ կարծեմ ամուսնական կեանքը, զինուորական կեանքին հետ այն երկու բե-

ւեռներն են որոնց վրայ կը թաւալի մարդկային կեանքի գունդը, սա տարբերութեամբ որ մինչ բեւեռները սառուցեալ են, ընտանեկան բոյն ու զինուորի վրանը ջերմութեան մէջ կ'եռուզեռան :

Ա՛հ, սիրելի Սիմոն, քու զուարթ ուղեւորութիւնդ դէպի կտիրնէ ու իմ բերկրալի գնացքս դէպի հարսանեկան առաջաստը՝ կարծեմ յար եւ նման են իրարու։ Նոյն խանդավառ կեցցէները, նոյն ուրախութիւնն ու հրճուանքը, նոյն բաժակները եւ բարեմաղթութիւնները, նոյն երդերն ու պարերը։

Այս նամակս կը գրեմ հարսնիքի դիշերն իսկ, երբ տակաւին հարսնեւորները ամբողջովին չեն մեկնած տունէն ու հարսը նոր փոխադրուած է իր սենեակը։ Ա-սիկա գուցէ տարօրինակ թուի քեզի, բայց դիտմամբ նամակ դրելու համար այս գերազոյն ըոսէն ընտրեցի, որպէսզի ցոյց տամ որ կեանքիս ամենէն հանդիսաւոր վայրկեանին չեմ մոռցած քեզ։

Բայց անշուշտ չես պահանջեր որ նամակս շատ երկարեմ։ Իմ պաշտելի Հերմինէս կը սպասէ ինձի սըրտատրոփի, գոյնէ այնպէս կ'ենթալրեմ։ Պարտականութեանս ձայնը զիս կը կանչէ իր մօտ եւ գուն իբրեւ օսմանեան բանակի զինուոր, դիտես այդ ձայնին նուիրականութիւնը։

Քու նամակէդ կը տեսնեմ որ գոհ ու երջանիկ ես զինուորական կեանքէդ։ ապրիս ուրեմն։ Ես ալ կը խոստովանիմ որ քեզի չափ գոհ ու երջանիկ եմ այս միջոցիս եւ թէ ամուսնական լուծը ուսերուս վրայ պիտի կրեմ այնքա՞ն թեթեւութեամբ որքան դուն մաւզէրի հրացանդ։ Եւ եթէ քու հրացանդ վեցհարուածեան է,

գուցէ ես ալ այդ մասին քենէ նախանձելու բան մը չպիտի ունենամ։

ՅՈՎԱՆՆԻ

Գ.

ՍԻՄՈՆ ԱՐ ՅՈՎԱՆՆԻ

1909 Հոկտեմբեր

Սիրելի եղբայրս,

Առաջին խանդավառութիւնները եւ կեցցէները անցընելէ եռքը, հիմա, երէկուընէ ի վեր, զօրանոցի կանոնաւոր կեանքը կ'ապրինք, թէեւ մարդանքները քանի մը օրէն հազիւ պիտի սկսինք, որովհետեւ մեր գունդին հարիւրապետը որ շատ ազնիւ ու հաճոյակատար անձ մըն է, նկատելով քրիստոնեաներու անլարժութիւնը զինուորական կեանքին, մեղ չխրտչեցնելու համար, որոշած է կամաց կամաց եւ աստիճանաբար վարժեցնել մեղ զինուորի վսեմ պարտականութիւններուն։ Մեր տասնապետը, Զավուշ Ահմէտ, թէեւ խստաբարոյ եւ անտանելի մէկը կը թուի, բայց գոնէ առ այժմ հետերնիս աղէկ կը վարուի կոր։

— Ծղաքս, բանի մը պէտք ունի՞ք, հանդի՞ստ էք, եւայն ըսելով կը խօսի հետերնիս, բայց այնպիսի դէմքով մը որ կարծես ներքնապէս ըսել կ'ուղէ։

— Կրողը տեսնայ ամէնուղ ալ երեսը։

Այսուհանդերձ, ինչպէս ըսի, երեսանց աղէկ կ'երթայ հետերնիս։ Մեր փոքրիկ խմբակը կը բաղկանայ երկու Հայէ, երկու Յոյնէ, մէկ Հրեայէ, մէկ Առնավուտէ եւ երկու Թուրքէ։ Կերակուրը միասին կ'ուտենք եւ միեւնոյն խօսուցը կը պառկինք։

Եթէ ըսեմ որ մեր կերակուրները թօքաթլեանի ճաշարանին կերակուրներուն կը հաւասարին ապահովաբար չափաղանցած կ'ըլլամ :

Ընդհանրապէս բիլաւը անպակաս է : Առատ իւզով պատրաստուած բիլավ մը որուն մէջէն երբեմն համագույսուի կոճակներ, գնդասեղ, դերձան, կաշիի կտոր, կոտրած սանտր, պարապ վամփուշտ եւ ուրիշ այս կարդի օգտակար եւ զինուորներու անհրաժեշտ մանր առարկաներ կ'ելլեն : Հրեայ ընկերս զանոնք խնամով կը պահէ, իրրեւ ցեղերու համերաշխութեան յիշատակ եւ կամ դուցէ օր մը անոնցմէ օգտուելու համար :

Այս Հրեան որ ամէն ինքզինք ու իր ցեղը յարդող Հրեայի պէս Ավրամ կը կոչուի, ծայրայեղ հայրենասէր մըն է, եթէ ձեռքէն զայ ամբողջ աշխարհի պիտի տիրէ զայն Օսմանեան հայրենիքին նուրբելու համար :

— Այսօր եթէ Մեքսիքայի կամ Ճարոնի դէմ պատերազմ մը ըլլայ եւ իմ գունդս չղրկեն՝ կամաւոր կը դրուիմ ու կը մեկնիմ, յայտարարեց երէկ՝ մեր չափուշ Ահմէտին :

— Մեքսիքայի կամ Ճարոնի հետ դործ չունինք, պատասխանեց մեր տասնապետը, մենք եթէ երբեք պատերազմ ունենանք հաւանօրէն Պուլկարներու կամ Յոյներու հետ պիտի ըլլայ :

— Պուլկարներու կամ Յոյներո՞ւ հետ, ըսաւ հայրենասէր Ավրամ, բո՞ւհ, երբեք ինքզինքիս չպիտի ներեմ այդպիսի ճղճիմ թշնամիներու դէմ կոռուի երթալ եւ կը նախընտրեմ հրացանս մէկ կողմ նետել ու դասալիք ըլլալ, քան թէ այդպիսի վատութիւն մը դործել : Ահա՛ ասանկ եռանդուն տղայ մըն է մեր Ավրամը :

Բայց, խօսքը մէջերնիս, Պուլկարիոյ հետ կոռուի մը մասին այս օրերս շատ կը խօսուի կոր :

Քանի մը օրէ ի վեր փորհարութիւն մը ունիմ, բայց կը յուսամ որ հետեւանք մը չունենար :

ՍԻՄՈՆ

Դ.

ՅՈՎԱՆՆԻ ԱՌ ՍԻՄՈՆ

1909 ՀՈԿՏԵՄԲՐԵՐ

Սիրելի եղբայրս,

Ստացայ նամակդի որուն մէջ չեմ գիտեր ինչ մելամաղձիկ չեշտ մը կար որ չէր համապատասխաներ առաջին նամակիդ խանդապառ զուարթութեան :

Ափսո՞ս, կեանքը շարունակական տօն մը չէ : Այս ճշմարտութիւնը՝ ինչպէս դուն՝ ես ալ հասկնալու վրայ եմ : Ինչպէս դուն քու չափուշ Ահմէտդ ունիս որ արդէն սկսած է մտատանջութիւն տալ քեզի, ես ալ, Հերմինէիս քով ունիմ զոքանչս, Նեմզուր հանրմը, որ ճիշդ քու տասնապետիդ պէս թէեւ երեսանց տակաւին մեղր ու կարաղ է, սկայն մերթ ընդ մերթ քացախի բարկ համ մը տալ կը սկսի :

— Վա՛խ եավրուս, աս աչքերուդ բոլորտիքը ի՞նչ եղեր է, կ'ըսէր երէկ առտու Հերմինէին :

— Ի՞նչ կայ որ, հարցուցի :

— Ի՞նչ պիտի ըլլայ, մեղա՛յ, կասկապուտ եղեր է... երեսին գոյնն ալ պատ է դարձեր... իմ գիտցածս՝ ամէն բանի չափը կայ... մեղա՛յ, ամէն մարդ ալ փեսայ կ'ըլլայ ամա, եօլօվը, վա՛խ, վա՛խ, վա՛խ... :

Այս խօսքերը կարծեմ աւելի անհաճոյ են քան քու կերած բիլավդ, բայց առ այժմ առանց ձայն հանելու

Կը կլեմ կոր, մանաւանդ որ Հերմինէն այդ հարցի մասին բոլորովին տարբեր աշխարհահայեացք մը ունի: Եւ երբ երէկ զոքանչս այս խօսքը արտասանելէ ու դէպի ինծի խոժոռ նայուածք մը արձակելէ ետքը դուրս ելաւ, Հերմինէ իր հրեշտակային ձայնովը ըստ:

— Դուն անոր խօսքին մի նայիր... հա՞ , աղուորս...

Այսպէս ուրեմն չավուշ Նեմզուր, մեղա՞յ, Նեմզուր հանըմ մեր ամուսնական Խօվուշին մէջ կը համապատասխանէ քու տասնապետիդ եւ նոյնիսկ քիչ մըն ալ կը գերազանցէ զայն, քանի որ քուկդ տակաւին իր ակունքը ցոյց տալ չէ սկսած :

Բայց, սիրելի եղբայր, պէտք է համակերպող ՛լանք եւ համբերութեամբ տանինք զինուորական եւ ամուսնական կեանքի պարտականութիւնները:

Թուրքիոյ եւ Պուլկարիոյ միջեւ հաւանական պատերազմի մը երկիւնեղը կարծեմ շատ վաղահաս են: Նըմանօրինակ վախ մը ես ալ կրցի երկու օր առաջ եւ պահ մը կարծեցի թէ կրիւ պիտի ծագէր մօրս եւ զոքանչս միջեւ կորսուած ասեղի տուփի մը առթիւ, սակայն խնդիրը իրաւարարութեամբ կարգադրուեցաւ: Կը յուսամ որ նոյնը կը պատահի նաեւ երկու տէրութիւններուն միջեւ:

Առ այժմ շատ սէր եւ համբոյր իմ եւ կնոջս կողմէ:

ՅՈՎԱՆՆ

Ե.

ՍԻՄՈՆ ԱՌ ՅՈՎԱՆՆ

1909 Նոյեմբեր

Սիրելի եղբայր,

Շիտակը, եղբա՞յր, այս զինուորական կեանքը գիւրաւ ուտուելիք ապուր չէ: Արտաքինէն փայլուն ու չողշողուն կ'երեւայ բայց մէյ մը մէջը մտա՞ր մի, համը

Հոտը կը փախի: Էտիրնէ, ինչ որ էր, դէշ աղէկ կ'երթայինք կոր, բայց հոն չթողուցին մեզ: Հաղիւ թէ քիչ մը զէնք բռնելու վարժուեցանք, մեզ ճամբայ հանեցին: Այս ուղեւորութիւնը նախ կառախումբով կատարեցինք, բաւական հանգստաւէտ պայմաններու մէջ: Անցանք Տէտէաղաճէն, Տրամայէն, Սէրէդէն եւ հասանք Տէմիլ Հիսար: Անկէ անդին, մինչեւ ձումաս Պալա ուր կ'երթայինք, տակաւին քանի մը օրուան ճամբայ կար զոր հարկ էր ուտքով կտրել: Ու այսպէս լեռներէ ու ձորերէ, զետերէ ու անտառներէ անցնելով, քարերուն ու մացառներուն վրայ կոխկոտելով, մերթ անձրեւին տակ թրջելով, մերթ արեւին տակ խացելով հասանք ձումաս որ Մակեդոնիոյ մէջ փոքրիկ քաղաք մըն է թուրք եւ պուլկար սահմանադլխին ժամ մը ասդին:

Զարմանալի բան էր գաղափարներու այն յեղաշրջումը որ մեր ճամբորդութեան միջոցին տեղի ունեցաւ զրեթէ մեր ամէնուս մէջը: Կը յիշեմ մեր Պոլսէն մեկնած օրը. այն ի՞նչ պատերազմաշունչ ողեւորութիւն մը կար ամէնուս վրայ, կռուելու, կրակին մէջ նետուելու խօլական փափաք մը, ի՞նչ մարտական երազներ...: Բայց ահա՝ իտիրնէի մէջ իսկ սկսաւ յեղաշրջումը, գաղափարային բարեցրումը երբ մատկերները մեր ձեռքը տալով՝ մէկիկ մէկիկ բացարեցին անոնց սպաննիչ կատարելութիւնները: Մեր պատերազմասէր Հրեայ ընկերը որ Մէքսիքայի կամ ճարանի դէմ կռուելու պատրաստակամութիւնը կը յայտնէր, սա արդարացի գիտողութիւնը ըրաւ երբ մեր հրազդաներուն ներբողը կ'ընէին.

— Իրաւցընէ հրաշալի գործիք. բայց ավագո՞ս որ անոնք ալ նոյնը ունին...:

Անոնքը, կը հասկնաս անշուտ, մեր ապագայ թրշ-



նամիներն են, ձարոնցի, Մէքսիքացի կամ Պուլկար : Կտիրնէն ճամբայ ելլելով, քանի կը յառաջանայինք սահմանադլուխ նոյն համեմատութեամբ մեր խաղաղասիրական զգացումները կը զօրանային :

Ճումաա Պալայի մէջ երբ մեզի ցոյց տուին Պարագօվայի ճամբան, որուն կամուրջին կէսէն կը սկսի պուլկարական սահմանադլուխը, տարօրինակ բան մը անցաւ մէջերնիս : Թուլսթոյի, Ֆրէտէրիք Փասիի, Նօպէլի, Սթէյտի եւ բոլոր բաշտեններու, բոլոր խաղաղութեան քարողիչներու պատկառելի ու պաշտելի դէմքերը ցըցուեցան մեր առջեւ... : Իրա՛ւ, ի՞նչ տղեղ, ի՞նչ հրէշային բան է պատերազմը :

Վերջին պահուն կիմանանք թէ սահմանադլուխին վրայ դէսք մը պատահած է ու հաւանօրէն մեզ դէպի հոն պիտի փոխադրեն : Աստուած ինք ողորմի... :

ՍԻՄՈՆ

Զ.

ՅՈՎՆԱՆ ԱՌ ՍԻՄՈՆ

1909 Նոյեմբեր

ՍԻՐԵԼԻ Եղբայրս,

Քաջութի՛ւն, եղբա՛յր, կեանքը զաւեշտախաղ մը չէ եւ ամէնքս ալ տառապելու համար ծնած ենք : Միթէ կը կարծես թէ ե՛ս, իմ ամուսնական կեանքին մէջ, քենէ նուա՞ղ կը չարչարուիմ, միթէ կը կարծես թէ մաւզէրի հրացան մը աւելի՞ սպաննիչ է քան զոքանչի մը լեզուն... եւ միթէ ընտանեկան յարկի գորգերուն տակ չիկա՞ն մացաներ ու քարեր ծածկուած՝ որոնք թաւալգլոր կը բերեն մեզ : Պարագօվայի կամուրջը ես ամէն ժամ, ամէն բոպէ ունիմ աչքիս դէմը ու երեւակայութեանս առջեւ, անակնկալ ընդհարումներու մըշտընջենական յաճախանքովը :

Իրա՛ւ որ երբեմն կը փորձուիմ հարցնելու ես ինձի թէ ամուսնակա՞ն կեանքը աւելի տաժանելի է թէ զինուուրականը : Ու չեմ կրնար վճռական պատասխան մը գտնել :

Ամէն պարագային՝ մտատանջութիւնը զիս ալ կը սկսի պաշարել : Ապազայ պատերազմներու երկիւող իմ վրաս ալ կը տիրէ եւ, խօսքը մէջերնիս, արդէն իսկ զոքանչս իր պահեստի ուժերը դէնքի տակ կոչելու սկսած է : Երէկ վերջնադիրի պէս սպառնալիք մըն ալ նետեց .

— Աղջիկս կ'առնեմ կ'երթար, ըսելով :

Պարզապէս անոր համար որ թատրոն կամ դիւղ դաշած ատեննիս զինքը միասին չենք տանիր յաճախի : Կինս որ առջի ամիսները զոքանչիւսայական անհամաձայնութիւններու միջոցին՝ միշտ իմ կողմս կը բոնէր, այժմ կը սկսի հակիլ դէպի թշնամին, այնպէս որ հաւանական պատերազմի մը ժամանակ կոռուող կողմերու զօրութիւնը իրարու հաւասար չպիտի ըլլան եւ ասոր համար յաճախ ստիպուած եմ տեղի տալ զոքանչիս որ օր աւուր աւելի անտանելի կը գտննայ :

Դուն Ճումաա Պալայի մէջ դուցէ հանդիսոտ չես կրնար քնանալ անակնկալ թնդանօթի մը ձայնին երկիւուն, ես ալ հոս հանդարար գում մը չունիմ՝ զոքանչիս ձայնին յանկարծական որոտումի վախէն :

Ու երբ նեմզուր հանըմի սպառնական ուրուականը ունիմ ամէն ժամ գլխուս վրայ կախուած՝ խեղճ կինս չերմինէն ալ իր դէմը ունի մայրս որ այնքա՞ն կատարելութեամբ անտանելի կ'ըլլայ իր կեսուրի դերին մէջ, որքան միւսը իրբեւ զոքանչ : Ընտանեկան կեանքի մէջ կեսուր եւ զոքանչ այն են ինչ որ են պատերազմի ատենքութայի ու ժանտախտի համաձարակները կոռուող բանակներուն մէջ : Այսինքն գերմարդկային պատուհաս-

ներ :

Եւ սակայն քաջ ըլլանք երկուքս ալ :

ՅՈՎՆԱՆ

Է

ՍԻՄՈՆ ԱՌ ՅՈՎՆԱՆ

1909 Դեկտեմբեր

Սիրելի եղբայրս,

Պը՛ռու... ցուրտն ու ձիւնը մէկ կողմէ եւ միւս կողմէ պո՛ւմ, պո՛ւմ հրացանի սուլումը, քաշուելիք բանչէ, սիրելի եղբայր, այս զինուորի կեանքը :

Անշուշտ թերթերու մէջ կարգացիք սահմանագլխին վրայ պատահած դէպքը : Երեք պուլկար զօրքեր սահմանագլխին հինգ մէդր ասդին կ'անցնին, մեր թուրք պահակները հրաման կ'ընեն որ ետ դառնան, անոնք կ'ընդդիմանան, հրացանաձգութիւն մը կը սկսի, պուլկարներէն մէկը կը սպաննուի, միւսը կը վիրաւորուի, մեր կողմէն ալ զինուոր մը մահացու հարուած մը կը ստանայ : Դէպքը պատահելին երկու ժամ ետքը մեր ամբողջ գունդը սահմանագլխին վրայ էր եւ ահա երկու կողմէն հրացանաձգութիւնը սկսաւ : Գնդակները մեր դիլուն վրայէն կ'անցնէին սուրալով, մենք, զետնին վրայ պահկած՝ ըստ բախտի հրացան կ'արձակէինք, առանց դիմացնիս բան մը նշմարելու : Հրացանաձգութեան առաջին տպաւորութիւնը սոսկալի եղաւ : Սարսափէս ամբողջ մարմինովս կը դողդղայի : միջոց մը նոյնիսկ կարծեցի թէ մեռած էի... Վերջապէս հրաման ըրին կրակը դաղբեցնելու : Պուլկարները արդէն իրենց կրակը դադրեցուցեր էին մենէ առաջ : Լայն շունչ մը առի եւ ոտքի ելայ . չէի մեռած, բայց բոլորովին վստահ չէի այս մա-

սին եւ շուրջու կը նայէի ողջ մնալուս ապացոյց մը փընտռողի մը պէս :

Յանկարծ քիչ մը անդին նշմարեցի մեր ընկերը՝ Ավրամը՝ որ գետնին վրայ տարածուած էր հրացանը քովը դրած :

— Ոտքի չելլե՞ս, ըսի իրեն, պատերազմը լմնցաւ : Խեղճը ապուշ ապուշ սկսաւ երեսս նայիլ առանց խօսելու :

— Ի՞նչ ունիս, վիրաւորուա՞ծ ես :

Դարձեալ պատախան չիկայ :

Մտատանջութեամբ ծոեցայ իր քով եւ վարփայիչ ձայնով մը ըսի :

— Ավրամ, իմ քաջ Ավրամս, ի՞նչ ունիս, ինչո՞ւ չես խօսիր...

Մարդը դողահար ձեռքը բերնին տարաւ, հասկցնելու համար թէ չէր կրնար խօսիլ :

Արդարեւ լեզուն բռնուեր էր :

Ահմէտ չավուշ որ հեռուէն մեղի նշմարած էր, ինքն ալ մօտեցաւ :

— Ոտքի չելլա՞ս, գոչեց ստենտորեան ձայնով մը :

— Ահմէտ աղա, խեղճին լեզուն բռնուեր է, ըսի :

— Լեզո՞ւն բռնուեր է մի, պուաց մեր չավուշը, կեցիր ես հիմա անոր լեզուն կը բանամ :

Եւ դէսի վար ծուելով շառաչուն ապտակ մը իջեցուց Ավրամի երեսին :

— Ա՛, ա՛ֆ էտէրսինիզ Ահմէտ աղա, աղաղակեց Ավրամ, որուն լեզուն բացուած էր :

Ապտակարուժական այս հրաշալի գործողութենէն ետքը, զինուորական զնացքով վերադարձանք ծումաա Պալա ուր գեղացիները մեղ ընդունեցին կեցցէներով եւ ծափահարութիւններով : Իրիկունը մեր Ահմէտ չավու-

Հին հարցուցինք թէ մեր ըրածը պատերա՞զմ էր :

— Զէ՛, պատասխանեց, պատերազմը ասանկ չըլ-լար, ասիկա պարզ հրացանաձգութիւն մըն էր առանց նպատակի... Բուն պատերազմը իշալլահ քանի մը օրէն կը տեսնաք երբոր Ալպանիա երթանք...

— Ի՞նչ, Ալպանիա՞ պիտի երթանք կոռւելու, հարցուցի ձայնով մը որ խիստ անայլայլ պիտի ըլլար եթէ ծայրայեղօրէն դողահար չըլլար :

— Այո՛, հարիւրապետը այնպէս ըստու... պիտի երթանք ապստամբ Ալպանիացիները զսպելու... այն ատեն իշալլահ կը տեսնաք կոիւին ինչ ըլլալը... :

— Իշալլահ, պատասխանեցի, գլուխոս անդին դարձընելով :

Եւ ահա՛ մեր Ավրամը նշմարեցի.

— Ավրամ', իմաց՞ր, պիտի երթանք Ալպանիացիները զսպենք...

— Ա՛, ա՛, ա... պատասխանեց :

Նորէն լեզուն բոնուեր էր : ՍԻՄՈՆ

Յ. Գ. Ահմէտ աղա վայրկեան մը առաջ լուր բերաւ որ վաղն առտու կանուխ ճամբայ պիտի ելլենք դէպի Առնավուտլուխ: Գուցէ այս վերջին նամակս ըլլայ... աղօթեցէ՛ք հոգիս համար : Նոյն

լ.

ՅՈՎԱՆԱՆ ԱՌ ՍԻՄՈՆ

1909 Դեկտեմբեր

Սիրելի եղբայրու,

Պատերազմաշունչ եւ սրտայոյդ նամակդ ձեռքս հասաւ ձիշդ այն միջոցին ուր երեք օրէ ի՛ վեր պատերազմը սկսած էր մեր տան մէջ ... Արդէն քանի մը օրէ ի վեր կը զգայի որ զոքանչս իր բոլոր պահեստի զօրու-

թիւնները հաւաքելու վրայ է : Ես ալ այդ պատրաստութիւններուն հանդէպ անգործ չմնացի եւ ջանացի իսկոյն դաշնակիցներ շահիլ ինծի : Մայրս արդէն, հարկ չիկայ ըսելու, ինծի հետ է, բայց կնոջս մասին պէտք եղած վատահութիւնը չունիմ եւ չեմ գիտեր թէ վճռական պարագային ինչ գիրք պիտի բռնէ :

Անհամաձայնութեան գլխաւոր առանցքն է կնոջս օժիտը : Գիտես արդէն որ երեք հարիւր օսմանեան ոսկիի արժողութեամբ երկաթուղիի պարտաթուղթեր բերած է : Այդ պարտաթուղթերը, ըստ մէր պայմանին, հնչուն դրամի պիտի վերածուէին եւ պիտի ծառայէին իմ առեւտրական գործս ընդարձակելու : Արդ, զոքանչս հիմա այս պայմանը յարդել չուզեր եւ կը պահանջէ որ պարտաթուղթերուն կէսը միայն ծախուի ու դրամագըլթեր իսկ միւս կէսը առնենայ, իսկ միւս կէսը անձեռնմիւլի մնայ եւ կնոջս պատկանի : Դժբախտութիւնը այն է որ թուղթերը իմ քովս չեն, եթէ ո՛չ զանոնք ուղածիս պէս գործածել շատ դիւրին պիտի ըլլար, այլ պահ դրուած են մէր բարեկամ Մարկոս էֆէտիին քով : Իրաւ՛ է որ ըստ օրինի այդ թուղթերը ինծի կը պատկանին, սակայն Մարկոս էֆէնտին զոքանչիս դրդումներուն վրայ, կը վարանի ինծի յանձնելու եւ կ'ուզէ որ մէջերնիս համաձայնութիւն մը գոյացնենք նախս : Ես չեմ ուզեր ծայրայեղ միջոցներու դիմել, որովհետեւ այն ատեն Մարկոս էֆէնտին պիտի վշտացնեմ եւ ինձ թշնամի ընեմ, ինչ որ կընայ իմ շահերուս վնասել, քանի որ հրապարակին վրայ միւս իր աջակցութեան կը կարօտիմ :

Ինչպէս կը տեսնես խնդիրը բաւական կնճռու է Մակեղոնական հարցին պէս : Մեծ պետութիւն մը կայ գործին մէջ, Մարկոս էֆէնտին, զոր պէտք չէ խրտչնել, միւս կողմը Պուլկարիս, կամ զոքանչս, անտանեցնել,

Մ կը դառնայ իր անիրաւ պահանջումներով, կինս՝ Հերմինէն՝ իրբեւ հպատակ ազգութիւն մը թէեւ առերեւոյթ ինծի հնաղանդութիւն կը կեղծէ, բայց ցեղային կապերով միացած է թշնամին հետ եւ ներքնապէս անոր հետ է: Մասնակի ըմբոստացումներ որոնք ատեն ատեն կը պատահին, կը հաստատեն իր այս արամադրութիւնը: Մայրս, թէեւ բոլորովին ինծի հետ, սակայն քայքայեալ վիճակի մէջ է, Պարսկաստանի պէս բան մը, որ զինուորական կարեւոր ոյժ մը չի ներկայացներ: Ահա՛, իր ընդհանուր գիծերուն մէջ, մեր տան քաղաքական կացութիւնը: Գալով մեծ եղբօրս, որմէ գուցէ իրաւունք ունէի օդնութիւն մը յուսալու, կատարեալ չէղոքութեան մը մէջ մեկուսացած է: Կարծես ըսել կ'ուզէ. «Յովնանեան խնդիրը իմ մէկ երկվայրկեանիս զոհողութիւնը չարքեր, ինչպէս ատենօք Պիզմարք կ'ըսէր թէ՝ «Արեւելեան խնդիրը Բոմերանիացի զինուորի մը մէկ ոսկորը չէր արքեր»

Եւ ահա՛ երեք օր առաջ ճաշասեղանի սահմանագլխին վրայ ծանր ընդհարումը սկսաւ զոքանչիս եւ իմ միջեւս: Անախորժ խոսքերու, վիրաւորիչ ակնարկութիւններու հրացանաձգութիւն մը կէս ժամի չափ տեսեց, բաւական խոր վէրքեր բանալով երկու կողմանց արժանապատռութեան չարքերուն մէջ: Կորիւը նոյն սահմաններուն վրայ շարունակուեցաւ երէկ եւ այսօր, որոնց միջոցին նախատական կծու գնդակներ ալ գործածուեցան երկուստեք: Այս տողերը գրած րոպէիս, զոքանչս իր սենեակին մէջ քաշուած ու ամրացած է, անշուշտ վճռական ճակատամարտի մը պատրաստութեան համար: Այս տագնապալից կացութեան մէջ աւելի երկար չեմ կրնար գրել... Աստուած իմ, այս ի՞նչ փորձանք է եղեր ամուսնութիւնը:

ՅՈՎՆԱՆ

Թ.

ՍԻՄՈՆ ԱՌ ՅՈՎՆԱՆ

1910 Յունիար

Սիրելի եղայրու,

Զիւն ամէն կողմ, լեռներուն դադաթը, հովկաներուն մէջ, դաշտերուն վրայ, եւ իրը թէ բաւական չըլլար արդէն երկրին երեսը ծածկուած ձիւնը, մէկ կողմէն ալ կը տեղայ ու կը տեղայ. ի՞նչ չույլ է բնութիւնը, երբ նեղութիւն պատճառելու վրայ է ինդիրը:

Il neigeait, il neigeait toujours !

Ինչպէս կ'երդէ Վիզթոր Զիւկօ: Ու մենք անվերջ կը քալենք ու կը քալենք այդ սպիտակ տարածութեան մէջն, մեր զինուորական քափօթներուն մէջ պլուած, հրացանն ու փամփշտոցը ուսերնուս: Ո՞ւր կ'երթանք, ո՞չ ոք գիտէ:

Տարտամ անուն մը միայն կը լսուի բերնէ բերան... Առնավուտլո՛ւս:

Եւ այս անունը, ո՞վ հեղնութիւն, յոյն ընկերոջս Խրիսթոյի, միտքը կը ձգեն անոյշ յիշատակներ, յունիսի եւ յուլիսի արեւովը տաքուկ: Առնավուտլո՛ւս, իրա՛ւ ալ որքա՞ն մօս է Առնավուտ Քէօյի, Վոսփորի այդ օդասուն եւ հելենագեղ ծովափին :

Ու ին՛զ Խրիսթոյին բերանը վրայ չի դար պատմելով հերուան քաղցրութիւնները, լուսնի լոյսով պըտոյտները, Աքընթը Պունիի սրճարաններուն առջեւ, թեւ թեւի իր էլէնիցային հետ, պատահական նշանած մը, ամառնային օդաղնացութեան մը վայելքը կը կնապատկելու կոչուած:

Անվերջ տեղացող ձիւնին տակ այդ քաղցր վերյի-

շումները քիչ շատ կը մեղմացնէին մեր տաժանելի խոն-
ջէնքին դառնութիւնը :

Դաշտեր ու ձորեր կտրել անցնելէ ետքը, մտանք
խոշոր անտառի մը մէջ, եթէ կարելի է այդ անունը տալ
ծառերու ճերմակ ու լերկ կմախքներուն՝ որոնք ան-
վերջ կ'երկարէին :

Հոն, ըստ մեր հարիւրապետին կարգադրութեան,
պահ մը պիտի հանդէջինք, թեթեւ ճաշ մը ընելու հա-
մար, մեր ճամբան շարունակելէ առաջ:

Արդարեւ գեղեցիկ ճաշ մը ըրինք:

Հաղիւ թէ մեր մախաղները բացինք հացն ու ձիթա-
պտուղը դուրս հանելու համար, ահա՛ բա՛թ, բա՛թ,
բա՛թ ճայները սկսան: Զինակոչի փողը հնչեց, պատա-
ռը բերաննիս՝ մեր հրացանները ուղղեցինք աներեւոյթ
թշնամին մը դէմ:

— Զէթաները եկան, դոչեց մեր Ահմէտ չավուշը:

Մենք բան մը չէինք տեսներ, միայն, կը լսէինք
զնդակներու սուլումը մեր գլխուն վրայէն:

Զինը հետզհետէ տւելի սաստիկ կը տեղար մեր
աչքերը կուրցնելու աստիճան:

— Կրա՛կ, դոչեց Ահմէտ:

Եւ հրացանները պարպեցինք:

— Առնավուտլուի... Առնավուտ Քէօյ կը հեկեկէր
քովս ի վեր Խրիսթօ, անցեալն ու ներկան իրարու հետ
շփոթելով:

Հրացանաձութիւնը կէս ժամի չափ տեւեց: Վեր-
ջապէս աներեւոյթ թշնամին լոեց. մենք ալ լոեցինք:

Գիշերը, մութը կոխելուն, հասանք Սիմանովա,
կամ ասոր մօտ տեղ մը....:

Ժ.

ՅՈՎԱՆԱՆ Ա.Ռ ՍԻՄՈՆ

1910 Յունվար

Սիրելի եղբայրս,

Ահուելի կացութեան մը մէջ կը դանուիմ, խելքս գը-
լուիս չէ եւ ի՞նչ գրելիքս չեմ գիտեր:

Տակն ու վրայ եղաւ ընտանեկան խաղաղութիւնս որ
արդէն շատ հաստատ հիմերու վրայ գրուած չէր: Վըճ-
ռական ճակատամարտը որուն մասին նախորդ նամակիս
մէջ երկիւղ կը յայտնէի, այսօր կատարուած իրողու-
թիւն մըն է:

Ինչպէս ըսի, զոքանչս իր սենեակին մէջ քաշուած
ու ամրացած էր, տեսակ մը Փէջնայի փոխակերպելով
զայն: Տան մէջ այս վիճակը չէր կրնար տեւել անշուշտ,
հետեւաբար ստիպուեցայ կիսս իր քով զրկել որպէսզի
հաշուութեան պայմաններուն վրայ համաձայնութիւն
մը գոյացնէ:

Սիրելի Հերմինէս վերադարձաւ հետեւեալ սլու-
տամ ը բերելով իր մօր կրողմէ.

Ա. Կնոջս բերած օժիտին կէսը Մարկոս էֆէնտիին
քովը մնայ եւ յատկացուի մեր ծնանելիք զաւակներուն
կըթութեան՝ եթէ մանչ են, օժիտին՝ եթէ աղջիկ ըլլան:

Բ. Զոքանչս իրաւունք ունենայ տարւոյն կէսը մէր
տունը անցընելու եւ իր հոն գտնուած միջոցին՝ մայրս
ուրիշ տեղ մը փոխադրուի:

Գ. Պտոյտի, թատրոն կամ այցելութեան վացած
ատեննիս զոքանչս մեղի ընկերանայ:

Դ. Ճաշի վրայ նախ կերակուրը իրեն հրամցուի:

Ե. Բաղնիք դացած օրերը, ըստ եղանակին, եալանին տոլմա, բարդինան տոլմասի եւ թուրշի պատրաստուի յատկապէս իրեն համար :

Զ. Իրեն հանդէս յարդանքի արտայայտութեան մէջ թերութիւն ըլլայ:

Այս վերջնագրին մէջ եթէ կային կէտեր որոնք ընդունելի էին, կային սակայն ուրիշներ որոնք կլուելիք րաներ չէին:

— Ես ասանկ պայմաններ չեմ կրնար ընդունիլ, եղաւ իմ պատասխանս, զործին կուզայ նէ՝ կը կենայ, եթէ ո՛չ պօղչան կը կապէ կ'երթայ:

Այս խօսքերը այնքան բարձր կերպով արտասանեցի որ թշնամի բանակատեղիէն իմացուեցան:

— Քեզի մեր դէմը հանողին Աստուած պէլան տայ, բարով խերով չհասնէիր փեսայ ըլլալու, աղջկանս էթէլը մտար, իշալլահ պատանքդ ես ձեռքովս կը կարեմ . . .

Եւ ուրիշ այս տեսակ անոյշ խօսքեր սկսան տեղալ իմ վրաս, բայց ես պաղարինութեամբ եւ համբերութեամբ սպառաղինուած առի քարեցի:

Իրիկունը տուն վերադարձիս տեսայ որ թշնամին նահանջեր եւ աներեւոյթ եղեր էր:

Միայն թէ ասով կոիւը չվերջացաւ: Հերմինէս կատղած՝ սկսաւ վրաս յարձակիլ եւ պահանջել որ իրեւեւ փոխարինութիւն մայրս ալ տունէն ճամբենք: Բնականաբար այդ պահանջումին գոհացում տալ մերժեցի եւ առաջին անդամ ըլլալով, էրիկ կնիկ, ծանր խօսքեր ուղղեցինք իրարու:

— Ես կը ձգեմ մօրս տունը կ'երթամ, եղաւ Հերմինէն վերջին խօսքը:

— Դժոխքին բերանը զնա՛, պատասխանեցի ես ալ կոիւին տաք միջոցին:

Եւ ահա՛ այս իրիկուն տուն վերադառնալով տեսայ որ Հերմինէն մեկնած էր, իսկ մայրս կը պատրաստուէր մեկնելու:

Այսպէս ուրեմն, սիրելի եղբայր, կատարեալ ամայութեան մը մէջ այս նամակս կը դրեմ: Որչա՛փ երջանիկ ես դուն քու զինուորական վրանիդ տակ, քան ես հոս ընտանեկան յարկին ներքեւ:

ՅՈՎՆԱՆ

ԺԱ.

ՍԻՄՈՆ Ա. ՅՈՎՆԱՆ

1910 Փետրուար

Սիրելի եղբայրս,
Ահուելի ու տաղնապալի օրերու շրջան մը կը բոլորենք: Դեռ չմեռայ, բայց արդէն վիրաւորուեցայ ու երկու շաբաթի չափ մնացի հիւանդանոցը: Զլլա՛յ որ գող ելլես. առած վէրքս շատ թեթեւ բան մըն էր եւ այժմ հետքը անդամ չէ մնացած: Նախախնամութենչ զրկուած վէրք մըն էր որուն չնորհիւ տասնըհինգ օր անկողինիս մէջ հանդիսա պառկեցայ, մինչ ընկերներս ձիւնին ու բռւքին կը կոուէին:

Հիւանդանոցին ելլելուս պէս կրկին մտայ մարտական շարքերուն մէջ, ինչովէս պիտի ըսէին մեր յեղակութական տղերքը: Աչմէտ չափուշ, միւլազըմ Քեաղիմ պէյ զիս չնորհաւորեցին առած վէրքիս համար:

— Մե՛զք որ շատ թեթեւ էր առած վէրքդ, ըստ Քեաղիմ պէյ, եթէ երկրորդ անդամ չինք չնորհք վէրք մը առնես, պիտի առաջարկեմ որ քեղի պատուանշան մը տան:

— Իշալլահ, պատասխանեցի առանց մեծ խանդավառութեան:

Հաղիւ հիւանդանոցի անդորրութիւնը թողած, նորէն չարչարանքը սկսաւ:

Առոտու մը Ահմէտ չավուշ եկաւ մեզ մօտ եւ ըսաւ.

— Պատրաստուեցէ՛ք, լեռներուն մէջ պիտի երթանք:

Եւ ասիկա այնպիսի շեշտով մը որ ըսել կ'ուզէր.

— Տղա՛ք, Քեհատհանէ պատյտի պիտի երթանք:

Սարսափելի ցուրտ մը, գէրօէն այնչափ վար որքան կրնաս երեւակայել մեր մարմինը արդէն կը սառեցնէր: Տենդային շարժում մը տիրեց ամէն կողմ, Խրիսթօ, Ավրամ, ես եւ Ապու-Լամլամ, սուրիացի արար մը, սկսանք մեր նեղիանէն, չանքան, մաքրան, հրացանը, չարքները, եւայլն պատրաստել: Ուրիշներ, դուրսը, ձիերուն վրայ կը բեռցնէին հաց, ուազմամթերք, եւայլն: Իրարանցումը աննկարագրելի էր: Հարիւրապետնիս ասդին անդին կը վազգզէր հրամաններ արձակելով: Յայտնի կ'երեւար որ կարեւոր արշաւանքի մը կը պատրաստուէինք: Ահմէտ չավուշ կատարեալ հրամանատարի հովեր առած, աջ ու ձախ կշտամբանքներ կ'ուղղէր:

Վերջապէս մեկնումի շեխորը հնչեց, շարքերը կաղմուեցան եւ ճամբար ելանք:

— Ո՞ւր կ'երթանք արդեօք, հարցուցի Ավրամին որ քովս ի վեր կը քալէր եւ որ մեր խումբին ամենէն լաւատեղեակ անձն է միշտ:

— Զեմ գիտեր թէ ո՞ւր կ'երթանք, պատասխանեց ակունքները իրար զարնելով, միայն թէ լսեցի հարիւրապետը որ Քեազիմ պէյի կ'ըսէր. «պատզարակները պատրաստել տո՛ւր մեռեալներու եւ վիրաւորեալներու փոխադրութեան համար»:

— Ուրեմն կոռւելո՞ւ կ'երթանք, ըսաւ Խրիսթօ:

— Հապա կարծեցիր որ Աղընթի Պուռնի օղի խմելո՞ւ կ'երթանք կոր, պատասխանեց Ավրամ յուսահատական շեշտով մը:

Պահ մը Ահմէտ չավուշ մեղի մօտեցաւ եւ զուարթ գէմքով մը հարցուց.

— Տղաք, ի՞նչպէս էք տեսնամ, չյոդնեցաք ա՛…:

— Ո՛չ, պատասխանեցինք:

Յետոյ իր մտերմութենէն քաջալերուած, ըսի.

— Տակաւին շատ տեղ ունինք քալելիք:

— Զէ՛, հաղիւ ժամ մը, սա հեռուն լեռներ կը տեսնէք կոր, ճիշդ հո՛ն կ'երթանք, Գանլը Օվա ըսուած տեղը:

Գանլը Օվա՛, ի՞նչ չարաշուք անուն:

— Ի՞նչ պիտի ընենք այդ օվային մէջ, հարցուցի հետզհետէ մտատանջ ձայնով մը:

— Լուր առինք որ չէթաները եւ մէկ քանի հարիւր ապստամթներ հաւաքուեր են, կ'երթանք անոնք պատժելու:

Յետոյ, Ահմէտ չավուշ ուրախ դէմքով մը աւելցուց:

— Տղաք, աչքերնիդ լոյս, վերջապէս ճշմարիտ պատերազմի մը ներկայ պիտի գտնուիք մէկ ժամէն… թնդանօթներն ալ պիտի գոռան:

Ու Ահմէտ չավուշ կատակ չէր ըներ, ինչպէս պիտի տեսնես յաջորդ նամակովս:

ՍԻՄՈՆ

ԺԲ.

ՅՈՎՆԱՆ ԱՌ ՍԻՄՈՆ

1910 Փետրուար

Սիրելի եղբայրս,

Աստուած իմ, ի՞նչ ահոելի կացութիւն, ի՞նչ դժոխային վիճակ։ Հաղիւ վեց ամսուան ամուսնութենէ մը ետքը արդէն տակնութքայ եղաւ մեր նորակազմ ընտանեկան բոյնը... Բո՞յնը ըսի, մեղայ, մեղայ', որջը պէտք էր ըսել։

Յարաբերութիւնները բացարձակապէս խղուած են զոքանչիս, կնոջո, մօրս եւ իմ միջեւ, համաձայնութեան մը համար կազմուած գումարումէ մը ետքը որ յանկարծ ընդհանուր պատերազմի մը փոխուեցաւ, որուն միջոցին զրեթէ ամէնուս ալ արդանապատուութիւնները մահցու կերպով վիրաւորուեցան։

Հիմա կարելի է ըսել որ «գաղրեցաւ մարտին ամբոխ առ ի չգոյէ նահատակաց»։ Այո՛, սիրելի եղբայր, ամէնքս ալ նահանջեցինք եւ յայտնի չեղաւ թէ ո՛ր կողմը յաղթեց, միայն սա գիտեմ որ իմ երջանկութիւնս տուժեց բոլորովին։

Առ այժմ զինադադարի շրջան մը կը բոլորենք, որուն միջոցին Մարկոս էֆէնտի կը ջանայ հաշտարար վեհաժողովի մը դեռը կատարել դաշնադրութիւն մը կնքել տալով մեզի։

Ես շիտակը շատ յոյս չունիմ վեհաժողովի արդիւնքին վրայ եւ կարծեմ Մարկոս էֆէնտիի բարեկամական միջամտութիւնը ուրիշ բանի չպիտի ծառայէ այլ եթէ ինդիրը աւելի կնճոտելու եւ հաշտութիւնը բոլորովին անկարելի դարձնելու։ Որովհետեւ աներեւակալելի

բան է այս, Մարկոս էֆէնտի աչք ունի զոքանչիս, հետեւարար անկեղծ չչղոքութիւն մը կամ անկողմնակալութիւն մը չպահեր իր կատարած բանակցութեանց մէջ։ Միւս կողմէ սակայն զոքանչս ամուսնացած տեսնելու փրկարար երազը զիս չափաղանց կ'ուրախացնէ, միայն թէ չեմ ուզեր որ փեսայութեան թեկնածուն Մարկոս էֆէնտին ըլլայ, որուն քով կը գտնուի կնոջս օժիտը։

Ես պիտի նախընտրէի ձեռքովս ուրիշ փեսայ մը գտնել ու զոքանչս ամուսնացնել, միանդամ ընդ միշտ աղատելու համար իր ճիրաններէն եւ հիմա այս ուղղութեամբ է որ կ'աշխատիմ։

Կը տեսնաս որ ի՞նչ կնճռու ու մանուածապատ դժուարութիւններու մէջ կը տապլտկիմ։

Ա՛հ, ո՛րքան պարզ ու միապաղադ է քու կեանքդ իմինիս քով, ո՛րքան թեթեւ քու ընդունած վէրքերդ, ո՛րքան աննշան՝ կոփիներդ։ Պատերազմ, զինուորութիւն, տղայական խաղեր են ասոնք ամուսնական կեանքին քով։

ՅՈՎՆԱՆ

ԺԳ.

ՍԻՄՈՆ ԱՌ ՅՈՎՆԱՆ

1910 Մարտ

Սիրելի եղբայրս,

Ես, Խրիսթօ, Ավրամ, Ապու Լամլամ, Մուսթաֆա եւ քիւրտ Մկօ մէկ գծի վրայ շարուած, հողակոյտի մը ետեւ, ծունկերնիս գետինը եւ հրացաննիս ուղղած դէպի դիմացի հովիտը ուր տարտամ ստուերներ կը շարժէին, ստուերներ որոնք հետզհետէ կը ստուարանային ու

զանգուածային ձեւ մը կը ստանային, սրտարով կը սպասէինք այն բոլէին ուր մեր միւլաղիմը «կրա՛կ ը-րէք»ի վճռական հրամանը պիտի արձակէր,

Քանի մը ծանր կոփւներէ ետքը, եկեր հասեր էինք այստեղ ուր համախմբուած էին ապստամբները, չէթա-ներու խումբերով, պուլկար եւ դարատաղցի կամաւոր-ներով։ Վրդովեցուցիչ շնկոց մը տարածուած էր առ-տուն մեր նորավարժ շարքերուն մէջ։

— Թշնամին նոյնիսկ թնդանօթներ ունի եղեր, գու-ժած էր մեղի Ավրամ, որ ինչպէս ըսի մեր խումբին լլ-րաբերն էր։ Նոյնիսկ թնդանօթին տեսակն ալ որակած էր աւելցնելով։

— Լեռնային թնդանօթ։

Ու Հիմա հողակոյատին ետեւ կծկուած՝ մեր երեւա-կայութեան մէջ այդ լեռնային թնդանօթը կը մեծնար, կը մեծնար, առոելի, անհեթեթ համեմատութիւն մը կ'առնէր, մեր դրացի լեռը կարծես ամբողջովին թնդա-նօթի մը փոխուած էր, կամ սապէս ըսեմ, լեռնային թնդանօթը թնդանօթային լեռ մը եղած էր, որ վայր-կեանէ վայրկեան կը սպառնար իր կլափը բանալու, հուր կայծակ տեղալու մեր գլխին։ Այս սահմուկեցուցիչ տրամադրութեան մէջ էինք երբ յանկարծ ահեղ ձայն մը որոտաց, որուն յաջորդեց, ճիշդ մեր ետեւը, սոս-կալի ճարճատիւն մը։ Ամէնքս գետին ինկանք ահարեկ։

— Կրա՛կ, գոչեց միւլաղիմ Քեաղիմ պէյի ձայնը։

Այդ ձայնը, զարրիէկեան փողի մը պէս, վերակեն-դանացուց մեզ։ Հրացանները զորս գետին ճգած էինք, առինք եւ ըստ բախտի պարպեցինք օդին մէջ։ Քանի մը առինք եւ ըստ բախտի պարպեցինք օդին մէջ։ Քանի մը առ-սանք որ մեր ծիաւորները, կատաղի թափով մը կ'ար-շաւէին գէպէտ առաջ։ Միեւթոյն ատեն թնդանօթը կրկին

որոտաց, այս անգամ մեր կողմէն, որուն դիմացէն ու-րիշ թնդանօթ մը պատասխանեց։

Այս թնդանօթային տեսակցութիւնը, որքան ալ շա-հեկան թերեւս, մեր ականջները կը խլացնէր, տեսակ մը անգիտակից ապուչութեան մատնելով մեզ։

Որչա՞փ տեւեց այդ դժոխային աղմուկը, մէ՞կ, երկո՞ւ, երե՞ք ժամ, չեմ գիտեր. երբ դադրեցաւ, թըշ-նամին որը արդէն որոշապէս չէինք տեսած, անյայտ ե-ղած էր։

Երբ քիչ մը մեր յուզումը հանդարտեցաւ, նշմարե-ցի թէ վիրաւորուած էի. . . յետոյքէս եւ թանձր արիսնի մը լպրծուն զգայնութիւնը ունէի եւ սակայն ո եւ է ցաւ չէի զգար։

— Ավրա՛մ, ըսի քովի ընկերոջս, կարծեմ ծանրա-պէս վիրաւորուած եմ։

— Ես ալ, ըսաւ խեղճը լալկան դէմքով մը, յե-տոյքէս կը զգամ կոր որ արիսնը առատօրէն հոսած ու թանձրացած է։

Վայրկեան մը յետոյ նոյն վիրաւորանքը յայտնեց Արիսթօ։ Իրողութիւնը տարօրինակ՝ եւ սակայն ճշմա-րիս էր։

Ահոելի մտատանիջութեան մը մէջ մնացինք, առանց շարժիլ համարձակելու, վախնալով որ վէրքերնիս կը վիրարացուի։

Յանկարծ հաւաքումի շեփորը հնչեց։ Զինուորները գացին իրենց շարքերը կազմելու. միայն մենք եւ Ապու-կամլամ որ նոյնպէս յետոյքէն վիրաւորուած էր, մնա-ցինք մեր տեղը, փորերնոււ վրայ երկնցած։

Վերջապէս միւլաղիմ Քեաղիմ պէյ նշմարեց մեղի եւ մօտեցաւ։

— Չլեցի՞ք շեփորը, ի՞նչ պառկեր էք այստեղ,

գոչեց բարկութեամբ :

— Պէտք է Փէնտի, կմկմաց Ավրամ առանց տեղէն շարժելու, չորսերնիս ալ ծանրապէս վիրաւորուած ենք մեր ետեւի կողմէն :

Այս զեկուցումը որ կը կարծէինք թէ կարեկցութեան արտայայտութեամբ մը պիտի ընդունուէր մեր սպային կողմէ, տեղի տուաւ որոտաձայն քահքահի մը, որուն յաջորդեց մտրակի մէյմէկ հարուած ճիշդ մեր մարմնոյն վիրաւոր մասին վրայ, սա հրամանովը ընկերացած :

— Շուտ ոտքի ելէք, եթէ ո'չ...

Սպառնալիքը իր ամբողջութեամբը չէր արտասանուած երբ արդէն չորսերնիս ալ ոտքի կանդնած էինք :

— Ո՞ւր են ձեր վէրքերը, գոչեց Քեաղիմ պէտ, սուխօսնե՞ր...

— Պէտք է Փէնտի, կը զգանք կոր որ հոսած արիւնը թանձրացած փակչեր է միւերնուս, բացատրեց Ավրամ որ ամենէն համարձակախօսն էր մեր մէջ :

— Քակեցէ՞ք տեսնեմ ձեր բանթալօնները, հրամայեց միւլազիմը շեշտով մը որուն կարելի չէր չհնազանդիլ :

Եւ ահա՛ չորսերնիս ալ ստիպուեցանք մերկացնել մեր ստորին մասերը: Այն ատեն անախորժ հոռ մը որ ո'չ վառօթի, ո'չ մէնէլիթի եւ ո'չ ալ որ եւ է սաղմանիթի հետ առնչութիւն չունէր, ծաւալեցաւ չուրջերնիս:

— Գուշակեցի արդէն որ ձեր վէրք կարծածն ու արիւնահոսութիւն ենթադրածը ուր ըլլալու էր, ըստ մեր պատուական միւլազիմը ճայնը մեղմացնելով:

Եետոյ հայրական շեշտով մը աւելցուց .

— Գացէ՛ք, տղա՛քս, լաւ մը մաքրուեցէք եւ ձերմակեղէննիդ փոխեցէ՛ք, այս փորձանքը ամէն նորավարժ զինուորի զլխուն կուզայ երբ պատերազմի դաշտին վրայ առաջին անդամ թնդանօթի ճայնը կը լսէ...

Կ'երեւայ թէ, սիրելի՛ եղբայր, այս բանն է որ կը րակի մկրտութիւն կը կոչուի զինուորական կեանքի մէջ: ՍԻՄՈՆ

ԺԴ.

ՅՈՎԱՆԱՆ ԱՌ ՍԻՄՈՆ

1910 Մայիս

Սիրելի Եղբայրս,

Մեծ ուրախութեամբ եւ սրտի տրոփիւնով կարդացի կտիրնէն գրած նամակդ: Այսպէս ուրեմն, շաբաթէ մը քու զինուորական ծառայութիւնդ աւարտած, յաղթապանծ ու ազատ պիտի վերադառնաս քուկիներուդ քով: Կը գրես թէ մեծերդ որքա՛ն գոհ մնացած են քենէ՝ որ Քեազիմ պէտ առաջարկած է հրամանատարին քեզի տասնապետի աստիճան չնորհել, ապրի՛ս ուրեմն, սիրելի Եղբայրս: Այս վայրկեանիս կը յիշեմ քու մեկնումի օրերդ, այն ի՞նչ անձկութեան ու տաղնապի բուքներ անցուցինք: Կը կարծէինք թէ քեզ դժոխք կը զրկէինք եւ թէ այլեւս չպիտի տեսնէինք յաւիտեան քու երեսդ: Որքա՛ն պարապ ու անիմաստ վրդովումներ, Աստուած իմ:

Ափսո՛ս որ քու վերադարձիդ մեր երջանկութիւնը կատարեալ չպիտի ըլլայ, որովհետեւ հոս պիտի տեսնաս քու դժբախտ եղբայրդ, ընտանեկան անվերջանալի պատերազմի մը կրակներուն մէջ...: Խաղաղութեան ամէն փորձ, հաշտարար կարգադրութեան ամէն ձեռնարկ անյաջողութեան գատապարտուեցան: Զոքանչս

իր անողոք «ո՛չ կարեմք»ովը անսասան մնաց ընդդիմութեան պատնէշին վրայ : Իմ պարզած զիջողութեան սպիտակ դրօշակներուս մելինիթեան պայթուցիկ անձքներով պատասխանէց մինչեւ ետքը, այս աստիճան որ վերջապէս իմ առնական արժանապատութեանս վիրաւորանքին մէջ, ամէն չափաւորութիւն մոռնալով, եւ զինքը խաղաղութեան ստիպէլու համար, իր ամենէն զգայուն կէտին այնպիսի ոտքի հարուած մը տուի որ թաւալգլոր արագութեամբ մը սանդուփին վերի աստիճանէն յանկարծ ինքինքը վարի ոտքին քով դտաւ : Մարտական այս յաջողութիւնս սակայն շատ սուլի նստեցաւ ինծի, որովհետեւ բոլոր չէզոք տարրերը ինծի դէմ գրգուեց եւ ինքինքս անպարտելի զինակցութեան մը հանդէպ դտայ : Կինս որ փութացած էր իր մօր օդնութեան հասնելու՝ կրակի տաք միջոցին այնպիսի ապատկ մը ընդունեց երեսին որուն արձագանքը թնդացուց ամբողջ ընտանեկան յարկս ու անոր հիմերը սարսեց :

Վերջապէս, չերկարեմ, դործը ինկաւ Դատաստանական Խորհուրդին, ուր հրաւիրուեցայ համար տալու իմ վայրագ ու գաղանային արարքներուս մասին :

Զոքանչս, իրեւ ապացուցական փաստ պատկառելի Խորհրդին առջեւ պարզեց իր յետոյքը որուն վրայ անորոշապէս կը նշմարուէին ջղուտ ոտքի մը հետքերը եւ միեւնոյն ատեն ցոյց տուաւ իր աջ սրունքը, սանդըխային գլորումէն չարաչար վնասուած : Ասոնց վրայ աւելցաւ նաեւ կնոջս տրուած ապտակը որ զիս բաւական դժուարին կացութեան մը մատնեց : Քննութիւնը կը չարուարին կարգութեան մը մատնեց : Զոքանչս կը պահանջէ որ բաժանման հրաման տրուի կնոջս, առարկելով թէ այլեւս անկարելի է հետը կենակցիլը, քանի որ ամէն վայրկեան կեանքը վտանգի մէջ է եւ ուժ տալու համար այս պահանջումին

չվարանիր երեւան հանելու կարգ մը անկողնոցի դադանիքներ որոնք կը համեմէ իրեն յարմար տեսած թաշաններովը :

Կրնաս երեւակայել թէ բոլոր այս իրազարձութիւնները որքա՞ն գրգուած են իմ ջղային դրութիւնս եւ որքա՞ն չարաչար կերպով ալղած առողջութեանս վրայ : Պործս երեսի վրայ թողած՝ ահա այս ընտանեկան կը սիւներով օրերս կ'անցընեմ, դիմումներ ընելով, բարեացակամութիւններ մուլալով, փաստաբաններու հետ խորհրդակցելով :

Եեմ գիտեր թէ ի՞նչ վճիռ պիտի արձակէ Դատաստանական Խորհուրդը, բայց ամէն պարագային կը զգամ որ կացութիւնս միշտ դժնդակ պիտի ըլլայ : Եթէ բաժանումի որոշում տայ՝ ընտանեկան յարկիս քայքայումը պիտի ըլլայ վերջնականապէս, եթէ ինծի իրաւունք տայ եւ ստիպէ կնոջս դալ հետս միասին ապրելու, պատերազմը պիտի յաւերժանայ մինչեւ ետքը, որովհետեւ բոլոր անցած դարձածներէն ետքը այլեւս կարելի չէ որ առաջին օրերու խաղաղ ինանդաղատանքը տիրէ մեր մէջ, մանաւանդ քանի որ զոքանչս կ'ապրի իր սպառնական կեցուածքովը :

Երանի՛ քեզի որ անցաւոր զինուորութիւնը եւ ժամանակաւոր պատերազմը ընտրեցիր, երանի՛ քեզի որ անձանօթ թշնամիներու դէմ կռուեցար, առանց ոխի, առանց ատելութեան, առանց ջղագրգումի, թի՛ւր երանի քեզի որ վիրաւորուեցար զնդակով ու վառողով, որոնց տուած վէրքերը կը բուժուին ու հետքը կ'անձեւանայ : Երանի՛ վերջապէս քեզի որ քու զինուորական պարականութիւնդ լրացնելով՝ կը վերադառնաս պատասխան կեանքիւ : Բայց մենք, ակսո՞ս, որ ամուսնական կեանքին զինուորագրուեցանք, որ

19968

40

յանձն առինք կոռւիլ ընտանեկան մարտադաշտին վրայ, մեղի համար ա՛լ յաւիտեան ո՛չ հանդիսու կայ, ո՛չ խաղղութիւն, ո՛չ յաղթութեան փառքը, ո՛չ ալ պարտականութեան վարձատրութիւնը:

Մենք, ցկեանս թիապարտներու պէս, մեր ծանր շղթաներուն մէջ կազկպուած, դաժան ու անողոք ճակատագրի խարազանին տակ, մինչեւ մեր յետին չունչը պիտի մաքառինք, առանց փրկութեան արշալոյսը տեսնելու:

Ո՞ւ, սիրելի Սիմոն, ինչո՞ւ ես ալ քեզի պէս չընտրեցի դրախտային քա՞ղցր զինուրութիւնը, թեթեւ ու առժամեայ պատերազմները ու ինքինքս յիմարաբար մատնեցի Գեհենի հուրին ուրկէ չի կայ ազատում եւ ուր կայ միայն «լալ եւ կրծտել ատամանց»:

Ո՞վ ընտանեկան պատերազմ, ո՞վ պատերազմական խաղղութիւն . . . :

Եղբայրդ՝ ՅՈՎՆԱՆ

1911

ՎԵՐՁ



2013

ԿԵՇՆՔ ԱՐԴԻԵԱՄ

ԳՐԱԿԱՆ ԵՒ ԳԵՂԱՐՈՒԵՍՏ ՊԱՏԿ ԱՄՍԱԴԻՐ

Տարեկան բաժնեգին՝

Թրամսա Եւ գաղութներ Ֆր. 40 մ.

Արտասահման Ֆր. 50 մ.

Փափաքողներուն նմոյշ կը դրկուի :

Հասցէ ։ 30, Rue Drouot, Paris (9^o)

ՄԱՏԵՆԱՇԱՐ «ՇԱՆԹ»

1. ՅՈՒՍԱՀԱՏՈՒԹԵԱՆ ԺԱՅԹՔՈՒՄ

Առևկուսք Փօն Քօցէպուէ

Թարգմ. դերմաներէնէ

Մկրտիչ Պարսամեան (Սպառած)

2. ՔԵՐԹՈՂ ԱՄՈԼԻ ՄԸ ՀԱՐԻՒՐԱՄԵԱԿԸ

Ռոբերտ Բրաւնինկի ծննդեան

Հարիւրամեակը Եւ Եղիսարէթ

Բառէտ-Բրաւնինդ

Բրօֆ. Լեւոն Կիւրեղեան

«

3. ԱՐԻՒՆԻ ՏՕՆԵ

Դրուագներ պատերազմի կեանքէն

Մկրտիչ Պարսամեան

«

4. ԲՈՒՆ ՀԱՅԿԱԿԱՆ ՍՏԵՂԾԱԳՈՐԾՈՒԹԻՒՆ

Յ. Շահպազեան

«

5. ՊԱՏԵՐԱԶՄ ԵՒ ԽԱՂԱՂՈՒԹԻՒՆ

Հնտանեկան նամականի

Երուանդ Օսեան

25 Մէնք, Փր.

Printed in France